

皇朝藩部要略

皇朝藩部要略卷之十六

前史官壽陽 祁韻士 纂

寶山 毛嶽生 編次

江陰 宋景昌 校寫

平定 張穆 覆審

回部要略二

二十四年春

詔漠咱帕爾豫朝正宴。

賜觀上元燈。

賚漠咱帕爾及從至伯克等銀幣有差遣歸烏什復以

霍集斯妻偕子呼岱巴爾氏輸馬四十助援喀喇烏蘇軍。

諭嘉之護衛錫丕呢雅斯等傷痊固請從剿。

詔賞給銀幣素賚璫偕弟協理伯克茂薩獻馬百助軍。上念所部甫徙牲畜或不給。

詔歸之仍傳。

旨獎急公阿克蘇援兵至喀喇烏蘇圍解額敏和卓等還阿克蘇有賚資者偵瑪哈沁越阿克蘇遁偕索倫卒擒之。

詔給俘額敏和卓霍集斯請赴烏什集馬。

詔酌資。初和什克避霍集占。走布魯特。依阿特巴什鄂
拓克長明伊勒哈。至是布占泰復赴布魯特徵兵。和什
克乃偕明伊勒哈謁兆惠軍。請降。兆惠詰進兵道。和什
克曰。霍集占昆弟善。霍罕額爾德尼伯克大軍迫。將竄
往喀什噶爾西岐道三。請先據之。兆惠因檄霍罕勿助
逆。時定邊右副將軍富德屯和闐。兆惠議分道進兵。一
由阿克蘇攻喀什噶爾。一由和闐攻葉爾羌。和什克復
繪圖告曰。喀什噶爾西由鄂坡勒達霍罕敏珠爾嶺。由
玉斯圖阿喇圖什達安集延額德格訥諸部。請示檄防
賊竄。兆惠悉如言。夏進兵喀什噶爾。以和克什及色提

卜阿勒氏爲導。兆惠遵

旨。詢霍集斯由烏什進兵喀什噶爾道。告曰。烏什距喀什噶爾近。然道多石。且乏水泉。不若由阿克蘇。時賊圍和闐城急。副都統巴圖濟爾噶勒及富德後先以兵援霍集斯。自烏什馳會之。和闐圍解。

上以霍集斯舊轄其地。

詔授總管和闐六城阿奇木伯克。富德復遵

旨。詢由和闐進兵葉爾羌道。霍集斯告曰。伊里齊達呼爾。瑞取水艱甚。丕雅勒瑪至固瑞。雖有水草。而塞爾勒克。楚魯克。通阿里克。諸站多沙磧。馬行易疲。且距溫都

斯坦道遠。賊乘閒竄不及禦。請由丕雅勒瑪池南行。水草足。且便休息。富德議如言。霍集斯請遣和闐六城伯克。赴喀什噶爾。招降布拉呢敦。懼事不效。或累已。富德以聞。

諭曰。霍集斯感激朕恩。招降以離賊黨。深可嘉悅。著加恩賞給緞匹。至伊翰誠效策。果如所算。自必加恩。萬一布拉呢敦執迷不悟。於霍集斯何與。時額敏都霍什提卜等私以霍集斯招降阿卜都伯克。故告霍集斯。占霍集占。霍集占。戕阿卜都伯克。阿卜都里木等。且知大軍將至。偕布拉呢敦棄城竄。霍集斯從富德軍。由葉爾羌尾擊之。敗。

諸阿爾楚爾。賊遁伊西洱庫爾。官軍分隊擊。霍集斯偕阿克蘇伯克鄂對等。執纛呼曰。降者生。其屬阿里木立纛前。中賊銃死。霍集斯呼愈壯。回眾聞聲趨至。乞降者萬餘。霍集占等以兵阻之。不得遁。巴達克山。

諭曰。伯克霍集斯之兄弟諸子。多爲霍集占戕害。深可憫惻。伊此次亦屬奮勉。著加恩。晉封多羅貝勒。

賜恤阿里木。及從霍集斯兵弁銀幣。有葉爾羌回人額色尹者。號額爾克和卓。其始祖曰派罕帕爾。世爲回部長。居葉爾羌。領其族。族統稱和卓。猶蒙古族統稱台吉也。策妄阿拉布坦。侵葉爾羌。掠其族。置吐魯番。尋以吐

魯番內附。復脇徙伊犁。大軍定準噶爾。額色尹等乞降。霍集占其族也。復脇自伊犁歸葉爾羌。額色尹不從。避徙布魯特安集延諸部。弟帕爾薩及兄子禡木特圖爾都從之。霍集占與布魯特仇。以兵索之。不得。及聞大軍抵葉爾羌。額色尹偕圖爾都及布魯特之呼什齊鄂拓克長納喇巴圖。以兵攻喀什噶爾。襲英吉沙爾諸邑。布占泰徵兵至阿特巴什。其長明伊勒哈。以兵寡辭。布占泰歸。謀布拉呢敦將自喀什噶爾援葉爾羌。聞布魯特兵襲其邑。疑與大軍應懼不敢逼。喀喇烏蘇圍。則未知爲布魯特何鄂拓克也。至是禡木特謁兆惠軍。告以故。

且稱額色尹集兵納喇巴圖待我軍檄兆惠傳

旨獎給幣額色尹尋以兵至道遇賊百餘擊之獲纛一
獻軍門兆惠慰諭之遣副都統巴圖濟爾噶勒等以兵
九百援和闐鄂對啓額里齊城迎赴哈喇哈什擊賊於
博羅齊敗之諸城傳檄定遣其妻兄阿璠伯克馳告阿
克蘇會富德至鄂對遣從子阿卜都爾璠攜六城伯克
遠迎捷聞

嘉鄂對固守和闐功封輔國公遣歸阿克蘇授阿卜都
爾璠三等侍衛時議兆惠富德軍分道進

諭曰鄂對效力軍前已將二載自當稍爲休息聞伊行

裝爲賊所掠甚可軫念著賞銀二百兩在阿克蘇辦事
命下兆惠奏鄂對固請從軍

詔倍發裝資賊竄鄂對抵喀什噶爾會富德軍擊之敗
諸阿爾楚爾賊遁巴達克山富德遣鄂對攜降眾歸喀
什噶爾

諭嘉其奮勇晉封固山貝子額敏和卓以喀什噶爾麥
方熟遣子協理台吉茂薩先馳入城收糧濟軍食

詔賞茂薩公品級大軍至兆惠以茂薩理阿奇木伯克
務遣額敏和卓赴葉爾羌撫其眾

諭曰葉爾羌喀什噶爾二城乃回人根本補授阿奇木

伯克甚爲緊要。朕意欲以額敏和卓管葉爾羌。以玉素卜管喀什噶爾。有此等舊人在彼。始堪倚任。俟大功告成後辦理。霍集占旣竄。有布魯特兵攻喀什噶爾之布喇村。額色尹亟遣屬從侍衛成果檄止之。曰。葉爾羌喀什噶爾已定。若復進兵。是抗大軍也。布魯特兵乃還。兆惠遣額色尹等入覲。

上以其爲派罕帕爾裔。

詔封額色尹輔國公。圖爾都禡木特札薩克一等台吉。額色尹奏幸爲天朝臣僕。安置惟

命。詔留京師。并傳

諭兆惠將伊等家口送京與聚處時巴達克山伯克素勒坦沙不卽以布拉呢敦等獻其鄰部山東曰博羅爾山北曰幹罕霍集斯遣使招降兩部并告素勒坦沙曰若不獻逆當移軍討之冬十月巴達克山函獻霍集占首。

諭曰霍集斯自進兵以來竭盡所知諸務奮勉協同將軍大臣等克藏大事甚屬可嘉自當錫予優渥著加恩給郡王品級又

諭曰玉素卜雖未與將軍大臣等向在軍壘但駐劄烏什辦理諸事亦極奮勉著加恩賞給郡王品級尋

詔入覲伯克等四十四人以玉素卜借貝勒霍集斯領之復

諭曰額敏和卓玉素卜俱著勞績此時若同來則回部經理乏人額敏和卓著加恩晉封郡王駐葉爾羌辦事
十二月復

諭曰現在大功告成自應令額敏和卓還家但葉爾羌等城俱屬新附必得熟悉回部老成歷練之人駐劄辦理額敏和卓以舊人效力軍營頗著勞績深悉機宜是以暫令留駐但伊數年來已久離家室若仍令其隻身居外朕心深爲軫念可傳諭量攜家口暫行駐劄俟諸

事就緒。即可復回。議撤哈密駐防兵二千。以靖逆衛兵二百。瓜州兵三百。移置哈密。黃墩營兵二百。移置塔勒納沁。隸哈密副將轄。將徙多倫回眾於喀喇沙爾。素賚璫赴布古爾庫爾勒度。引水溉田。分地定居諸務。

獎賜銀幣。

二十五年。先是軍所疏劾霍集斯議烏什賦請如舊例。征十一。別無他貢額。憾阿克蘇伯克鄂對議事輒不協。善阿什默特乞司和闐六城伯克務。葉爾羌諸城頭目私饋受不辭。知吐魯番札薩克額敏和卓封郡王爵。故以伯克稱之。

諭兆惠富德等曰。霍集斯或不過恃功率意。卽暫示包容。如情形叵測。亦不得姑息從事。霍集斯自巴達克山還。請從凱師入朝。約兆惠等待阿克蘇。赴烏什做裝。如期會。以第三子托克托素丕從。舒赫德等遵

旨。將霍集斯拏赴京。

諭曰。前霍集斯葉爾羌被圍時。殊爲勞苦。往巴達克山亦頗效力。但仍令其居於舊地。究屬未便。俟伊到京時。再酌量從優安置。伊子漠咱帕爾啓程。亦不必照厄魯特宰桑之例。仍與前次入京一體辦理。舒赫德等當善爲慰遣。至伊等起程後。所查霍集斯家口。不妨明白曉

示以霍集斯蒙恩旨留京來取家屬團聚務宜供給饒裕加意照看蓋伊非獲罪之人籍沒家產者可比所有蓄積俱一同辦送仍約束兵丁回人毋許妄行偷竊其田園房屋亦應變價給賞以資生計至是復以烏什伯克阿琿等訐霍集斯父子虐部眾請以薩里代

諭曰烏什回人等訐告霍集斯父子虐部眾經辦事大臣等具奏朕以霍集斯抒誠效力所有過失皆從前陋習若遽行治罪心有不忍但仍令其管轄所屬則上下猜忌不能相安無事卽如準噶爾人等亦因聚斂成仇上旣凌暴下亦憤恨互相侵噬以底滅亡可爲明鑒因

欲將霍集斯父子優其廩祿安置京師而各城頭目亦
自知所懲創。悛改舊習。恐愚頑無識之徒。因此遂長刁
風。撫拾已往之事。公行訐告。或伊什幹等圖得阿奇木
之缺。或所屬人等妄生事端。挾制總管。大干法紀。嗣後
有似此者。非但不行辦理。仍究明情節。重治其罪。斷不
寬宥。爾等知此。惟期上下相安。勤於生業。勉爲良善。永
享昇平。又

諭薩里曰。薩里果行走奮勉。應再行酌量加恩。若卽授
爲阿奇木。則奸險之徒。羣以陷人奪缺爲得計矣。玉素
卜霍集斯鄂對等至京。

召謁於正大光明殿。

賚章服。飲至豐澤園。

賜銀幣。以烏什爲回部要地。

詔玉素卜弟阿卜都拉任烏什阿奇木伯克。從霍集斯入覲之伯克等將歸。

詔宣示烏什訐霍集斯狀。霍集斯奏烏什怨臣甚。臣蒙恩釋罪。請留居京師。

慰允之。

諭曰。霍集斯懇請留京。意殊誠切。著照所請。厚爲資給。安置京師。但見其先世墳墓。遠隔故鄉。著加恩將伊幼

子托克托索丕遣回阿克蘇。以供祭掃。其烏什所有田產。卽行變價。在阿克蘇置業。賞給托克托索丕承管。著舒赫德等遵照辦理。仍傳諭該處回眾。俾咸知朕恩。和什克亦疏列和闐。哈喇哈什。葉爾羌。沙古。則里。諸邑屬產。詔易值。留和闐。瞻其戚屬。

詔諸有勞績者。並圖形紫光閣。

御製贊辭。額敏和卓圖曰。吐魯番族。早年歸正。命贊軍務。以識回性。知無不言。言無不宜。其心匪石。不可轉移。霍集斯圖曰。奉元帥檄。擒達瓦齊。後稍觀望。旋迎我師。同大軍進。被圍黑水。回部望族。居之京邸。鄂對圖曰。平

伊犁時歸順勤王。回部傑出。其心允良。往諭和闐。被圍三月。共噶布舒。全守卓越。時阿克蘇伊什幹伯克頗拉特。覬阿奇木伯克。慫回眾薦已。訐鄂對。舒赫德斥之。疏聞。

諭曰。回人猜忌。擠排。乃其舊習。自當嚴爲杜絕。鄂對果不勝任。亦不當因頗拉特之言。遽行斥革。且鄂對卽因此獲咎。而頗拉特藉端聳眾。希圖代任之罪。亦應察究。斷無墮其譎計。竟授爲阿奇木之理。復以阿克蘇訐鄂對。若歸令仍舊職。將不安。

詔調葉爾羌阿奇木伯克。輔國公和什克額色尹。一等

台吉瑪木特圖爾都哈什木二等台吉阿伯都爾瑪三等台吉帕爾薩等先後入覲哈什木者本元太祖裔元太祖定西北諸部遣王駙馬等分領之次子察哈岱居伊犁兼轄吐魯番回眾十傳後遂棄蒙古俗習回教徙居吐魯番不復有伊犁地康熙末討準噶爾哈什木兄莽蘇爾迎獻駝馬策妄阿喇布坦惡而禁諸哈喇沙爾定北將軍班第定準噶爾莽蘇爾乞降議遣轄吐魯番舊屬會阿睦爾撒納叛道梗不得達至是定諸回城乃獲莽蘇爾及哈什木

上以其爲元太祖裔並授一等台吉與和什克等並留

京師統隸蒙古正白旗。視應得俸銀給祿米資贍。鄂對抵葉爾羌。伊什幹伯克阿卜都喇伊木等復訐鄂對嗜飲且躁妄不稱職狀。首列阿瑛名。

詔曉示各城回人。諸事嗣聽阿奇木伯克理。阿瑛勿妄豫辦事。都統新柱疏鄂對及阿卜都喇伊木有隙。恐誤公。

諭曰。回人性多疑懼。若爲之隱覆。恐伊等更覺不安。朕意竟將伊等傳集眾前。分別是非。加以訓飭。庶鄂對不致猜疑。阿卜都喇伊木亦不妄行防備。悔悟之後。和衷共事。自無掣肘之虞。後阿卜都喇伊木以不獲阿奇木

伯克私與霍罕額爾德尼伯克謀逆事覺論誅霍集斯疏列和闐戶產及吐魯番舊屬

詔給托克托索丕會漠咱帕爾行至沙泉子疾

詔醫視俟痊復乃就道復

命霍集斯寄之書令善自攝疾痊偕呼岱巴爾氏至詔與其父聚處額敏都霍什提卜亦逮至

上以霍集斯戚族故

詔免死給廣東福建駐防兵夏四月吏部侍郎副都統海明遵

旨赴葉爾羌辦事

諭曰海明係內地大臣奏事列名應在額敏和卓前但不可以名居前列卽輕視額敏和卓額敏和卓老成諳練辦理一切事宜當與和衷商酌時議設伊犁阿奇木伯克轄屯田回民

詔以茂薩任之鄂斯璜議借沙雅爾賽哩木拜城諸伯克備糧四萬餘運赴伊犁助回民屯務

詔獎賚之旋遣兵往護道由阿克蘇達海弩克薩里輪馬三十匹助理臺務

詔如例給值復優賚之俟有伊什幹伯克等缺補授會喀什噶爾商伯克邁喇木派蘇巴特伯克呢雅斯等叛

三
卷一百一十一
二
掠庫勒塔里木諸汎。色提卜阿勒氏自英吉沙爾聞之。以伯什克勒木派蘇巴特爲賊巢。偕提督楊甯往剿。擒斬賊黨。茂薩亦從參贊大臣阿里袞剿賊。派蘇巴特由薩林都道和羅木魯克尾之。賊方炊。以兵掩擒。

詔封茂薩輔國公。授色提卜阿勒氏散秩大臣。

諭曰。色提卜阿勒氏前隨兆惠進兵。甚屬勤慎。此次著有勞績。著加恩授散秩大臣。尋

賜二品頂帶。時英吉沙爾阿奇木伯克索勒屯和卓入覲。以色提卜阿勒氏代喀什噶爾辦事。大臣海明復

遣理派蘇巴特。阿奇伯克務。以其弟阿克伯克代

理英吉沙爾有阿卜都喇伊木者。霍集占逆屬也。初爲喀什噶爾阿奇木伯克間大軍至請降。

詔宥其從逆罪。授葉爾羌伊什幹伯克。至是偕噶岱默特等入覲。旋逆賊僞檄達葉爾羌約爲應。阿卜都喇伊木懼首之。噶岱默特語參贊大臣舒赫德曰。阿卜都喇伊木等聞賊倡亂。不無疑懼。請防之。舒赫德以聞。時叛賊呢雅斯等就擒。阿卜都喇伊木族無附逆。

諭曰。噶岱默特心有所疑。卽行稟告。具見悃誠。但阿卜都喇伊木等係初次入覲轉回之人。且邁喇木等黨與內並無伊子弟名目。若以曾經霍集占委用。遂懼其反。

覆則恐於伊等不無屈抑。而回眾更生疑懼。著舒赫德密諭噶岱默特。以天朝法度。惟顯犯罪惡。始行懲治。從不無故猜疑。致有屈抑。但爾誠意可嘉。恩旨深爲獎許。并明白曉示。阿卜都喇伊木云。爾等係入覲之人。不但未知賊匪倡亂之事。卽子弟等亦全無附和者。皇上已洞鑒情形。與爾等無涉。嗣後惟當矢心報效。以期永承恩澤。曉示後。仍令照舊辦事。秋霍集斯偕輔國公和什克尅。

蹕木蘭行圍。蒙古札薩克等進宴。陳詐馬什榜。教駢諸戲。

詔霍集斯列觀旋

蹕避暑山莊

命觀燈火與燕萬樹園冬葉爾羌伯克鄂對喀什噶爾伯克噶岱默特和闐伯克阿什默特等許額敏和卓從通事等虐回眾參贊大臣舒赫德察其誣飭責之鄂對等謝罪奏至

諭曰回人積習相沿彼此猜嫌譏毀惟在駐劄大臣持平守正嚴加約束著舒赫德曉示葉爾羌喀什噶爾回眾云大皇帝用人不過因材器使卽如茂薩先因喀什噶爾需員辦事故加委任今伊犁駐兵屯田又將伊補

授阿奇木並非在喀什噶爾爾等何得造言誣謗至
通事等皆哈密吐魯番之人若盡行裁革轉致無所見
聞且此番許告呈詞實屬奸狡之徒所構嗣後通事等
若敢苛累回人亦卽從重辦理以示懲創葉爾羌諸城
伯克以年班至

駕幸瀛臺謁列西華門外凡三十三人薩里居班首

上慰問之

賜尚方食

召覲於重華宮

賜茶果翼日

御西廠幄次。燕朝正外藩蒙古回部王公伯克等。霍集斯等並豫。是歲吐魯番副管旗章京呼岱巴爾氏。參領瑪哲克勒木。佐領瑪木特克勒木。護衛阿璊密喇木。驍騎校蘇爾等。以剿邁喇木呢雅斯功。並得優賚。回情暢洽。

二十六年春二月。

遣薩里等歸牧。陝甘總督楊應琚奏。肅州威魯堡安置吐魯番回民。計二百五十戶。墾地萬五千三百六十餘畝。戶口日增。地畝有限。請遣千戶珈如拉等歸吐魯番。詔廷議。尋奏肅州回民較初附增額。吐魯番已成樂土。

且多可耕地。應視瓜州回民例。悉遣歸。但千戶珈如拉。祖托克托瑪木特與額敏和卓俱避。準夷來歸。應酌給附闢。展吐魯番可耕地。俟秋收後。徙往。并以千戶珈如拉百戶伊明和卓爲正副伯克。令闢展大臣徵賦。從之。三月。

諭曰。從前辦理回人莽噶里克後。因伊屬人無所統束。暫令安置吐魯番。交額敏和卓管理。今大功告成。回部皆朕臣僕。自應各統其屬。不相兼并。朕意將此項回人內。擇其賢能者。授爲伯克等職。仍安置舊處。查明舊日賦役。照例供辦。又阿里袞前因追賊至羅卜諾爾。所收

回人亦照此例辦理。議於塔勒納沁居屯田兵興版築。玉素卜請助役不受工值。

獎賜幣及佩飾復。

諭優給口糧示恤。秋七月。舒赫德奏附闢展之連木齊木。有地六千畝。闢展英格二邑。有地千餘畝。請令千戶。珈如拉徙舊居。魯克沁眾赴連木齊木。百戶伊明和卓。徙舊居闢展英格。眾歸故地。按戶給田。以珈如拉伊明和卓授五品伯克。別設六品副伯克二分。轄色提卜阿勒氏抵阿克蘇。助赴伊犁屯田回民畜物。

獎資之。海明復疏。色提卜阿勒氏議本年雨澤應時。收

獲豐裕。但回人不知樽節。請令歲納穀五百石。貯倉備賑。俟積五千石。停收。

從之。九月。舒赫德奏羅卜諾爾部二。一爲喀喇庫勒。一爲喀喇和卓。喀喇庫勒置伯克一。約束難周。請增一員。協理。喀喇和卓。凡五邑。各置伯克一。不相屬。請令二員總管。二員協理。別設小伯克一。居吐魯番。理賦役。屬戶百八十三。每年納哈什翎百枝。海倫九張。

詔廷議。尋奏羅卜諾爾前以軍務未竣。暫隸額敏和卓。今回部蕩平。自應一體辦理。請定總管伯克秩五品。協理伯克及理賦役伯克秩六品。五品缺出。由闡展大臣

奏請六品缺出卽行補授具奏納賦如前額冬十月
諭曰前因額敏和卓玉素卜皆回部舊人若令伊等更
替駐劄辦事於新疆有益去年玉素卜來京會諭令在
哈密休息年餘今額敏和卓當還吐魯番休息以玉素
卜往代玉素卜著卽整裝候此次入覲回人等至哈密
時卽同護送之乾清門侍衛等帶領前往著授參贊大
臣應得公項照例支給以伊子伊勒巴喇伊木看守游
牧著加恩賞戴孔雀翎舒赫德奏吐魯番莽噶里克屬
及額琳哈畢爾噶之沙呼里烏默特等屬舊隸額穆和
卓轄給官穀被吐魯番役今僉稱安置久不願徙請以

莽噶里克屬戶五百餘。設總管四品伯克一。協理五品伯克二分。理六品伯克五。沙呼里等屬戶七十四。請卽以沙呼里爲總管五品伯克。烏默特爲協理六品伯克。統隸闡展大臣轄。

詔額敏和卓歸吐魯番。俟年班伯克入覲。偕至喀什噶爾辦事。左都御史永貴疏鄂羅木咱卜善理所部。

諭曰。額敏和卓數年辦事軍前。伊長子素賚瑞次子茂薩俱承辦公事。吐魯番等處事務。係伊第三子鄂羅木咱卜管理。著加恩賞戴二品頂帶孔雀翎。以示鼓勵。是年以葉爾羌諸城回情安靖。

獎諭曰。前因回人舊習。凡伯克等多。腴削所屬。是以賞給各城阿奇木伯克等錢帛地畝。及供役之人。俾得奉公自愛。近聞葉爾羌伯克鄂對喀什噶爾伯克噶岱默特等。頗知自愛。無苛擾回人之事。深屬可嘉。念伊等歸誠日久。著於官給六百騰格外。再加二百。以示鼓勵。此次係出自特恩。不可視以爲例。

二十七年。闢展辦事郎中德爾格奏。闢展屯田兵裁二百四十。所遺地畝。舊以吐魯番額敏和卓屬六十戶居闢展。九十三戶居連木齊木威魯堡。珈如拉屬六十戶居連木齊木。二十七戶居格英。每戶給田五十。請令額

敏和卓屬歸闕展珈如拉屬歸連木齊木以便約束仍有餘田三千畝分給莽噶里克沙呼里回人墾耕至裁汰兵丁所餘牲畜農具請量給威魯堡回人令納糧抵詔悉如議吐魯番免納糧以喀喇和卓托克遜屯田給回民爲世業葉爾羌辦事都統新柱偕額敏和卓奏葉爾羌和闐積穀多請令以其二折交騰格採買牲畜以其八折交納布運伊犁市哈薩克馬

諭曰折交錢布所及者廣最宜留心查辦卽如鄂對阿什默二人鄂對尙可信無取巧之事然亦因額敏和卓在彼有所顧忌耳今以玉素卜往代雖同屬舊時臣僕

而資望少減。恐鄂對不無玩忽。額敏和卓於鄂對宜從容開導云。爾當勿改初心。我暫歸一二年。再來駐劄。仍可相見如故。庶伊知所謹凜。將來與玉素卜交代時。亦宜告知。俾得留心辦理。凡遇回部伯克等。俱當詳悉訊誠。務期正已率屬。以挽頽風。尋議遣使巴達克山。

詔額敏和卓暫留葉爾羌。先是巴達克山伯克素勒坦沙。戮布拉呢敦。不謹視戶。爲其屬摩羅巴喇特等所盜。瘞派蘇巴特復竊育其孥。我使索不獲。至是尙書都統新柱及額敏和卓偵知之。會素勒坦沙以兵襲博羅爾。奪齊特喇爾地。遣弟沙卜多卜噶達爾據之。博羅爾長

沙瑚沙默特以告額敏和卓。遣薩里奉檄以往，示順逆義。且責歸所掠。新柱奏巴達克山若違辭，臣請率兵往討。留額敏和卓辦事。

諭曰：巴達克山如斥責不從，自當進剿。但新柱向未歷練戎行，額敏和卓頗悉回部情事，自當同往。薩里行旬有九日，抵巴達克山，示之檄。素勒坦沙獻盜尸者摩羅巴喇特。薩里攜赴派蘇巴特，掘得逆尸，復索其孥。素勒坦沙獻布拉呢敦妻三。曰珠賚哈。曰巴特瑪。曰額爾克揚子三。曰和卓阿新瑪。曰阿卜都哈里克。曰和卓巴哈敦。覆書額敏和卓，尊稱之曰父。詭言齊特喇爾爲已舊。

邑不卽歸。復遣薩里往責之。乃服。以齊特喇爾給博羅爾。撤其弟歸。

上念薩里奉使勞。

賜三等輕車都尉。復

詔給幣。俟阿奇木缺出。輒列名聞。會阿克蘇伊什幹伯克頗拉特以罪褫職。

詔薩里代以額敏和卓辦理協宜。

優賚之。永貴等疏。蠲回人賦役。不列額敏和卓及玉素卜名。

詔訓責之。

授素賚璫一等台吉。噶岱默特倡議偕諸伯克輸穀千石貯城邑。贍貧戶。復助材建兵屋三百楹。有

詔獎賚。追論攻喀什噶爾功。晉封圖爾都爲輔國公。色提卜阿勒氏以世居烏什。遣屬視祖父塋。請給烏什入官田產。以阿克蘇私業償。

諭曰。色提卜阿勒氏前在軍營。頗屬奮勉。已加恩授爲散秩大臣。阿奇木伯克奉職亦屬盡心。今以先塋之故。請派數戶遣往守視。自宜允行。所有給予田產。著加恩賞賜。不必由阿克蘇抵交。

二十八年春。永貴新柱疏調補諸城伯克。不列額敏和

卓等名

諭曰前次或爲所辦係加恩回眾之事伊等不欲市德署名至補授伯克自應同伊等商辦復有何嫌疑不行開列額敏和卓等俱久隸臣僕用至參贊大臣伊等如意欲辭避亦宜曉示令其勿存形跡時副都統額爾景額代新柱抵葉爾羌

上慮不更事

詔額敏和卓仍留處三月永貴疏言噶岱默特告回部田畝資溝渠利喀爾喀河曰赫色勒河出喀什噶爾西喀卜喀山溉東南托果斯遷養爾瑞喀什噶爾哈喇克

爾多羅特巴克阿爾巴特派蘇巴特諸邑過巴爾楚克
匯羅卜諾爾曰托庸河出喀什噶爾西北托庸山漑東
南玉斯圖阿喇圖什阿爾琥呼爾罕阿斯圖阿喇圖什
伯什克喀木諸邑與赫色勒河合流曰圖巴里克河出
喀什噶爾西南吉斯嶺及西界烏帕勒山上流向東漑
汗阿里克塔斯瑄赫色勒布伊諸邑下流向東北與赫
色勒河合流曰庫森塔斯瑄河出喀什噶爾西南英吉
沙爾城西羌瑄山漑東北英吉沙爾諸邑散流入沙磧
惟赫色勒布伊塔斯瑄汗阿里克三邑分引圖巴里克
河水不給用臣偕噶岱默特往視自赫色勒河東南浚

渠四十餘里。引水入赫色勒布伊。又視托庸河水湍急。田畝被衝刷。議建石土提壩。并鑿山石。以弱水勢。報聞。冬。玉素卜赴葉爾羌代額敏和卓還。額敏和卓以巴達克山事留葉爾羌。

詔玉素卜暫理阿克蘇務。至是事竣還。

諭曰。阿克蘇阿奇木伯克散秩大臣色提卜阿勒氏前隨兆惠出兵。曾經奮勇效力。著加恩賞給公品級。以示酬庸之典。

二十九年。色提卜阿勒氏來朝。封輔國公。

賜貂裘。先是布魯特額德格訥鄂拓克長阿濟拜以霍

罕額爾德尼伯克掠其邑。憾之。聞霍集斯雅特之不色勒伯克與搆難。潛兵襲之。霍罕使至葉爾羌。掠布魯特樵者十人。告梗道。噶岱默特察辭誣。詰之。會丕色勒伯克與額爾德尼伯克釋怨。阿濟拜懼。請檄霍罕勿侵已。永貴與噶岱默特責以厥罪均。令各安處。未幾額爾德尼伯克以布魯特薩婁鄂拓克長沙巴圖掠市馬告。噶岱默特索所掠歸霍罕。霍罕復侵額德格訥。奪鄂斯邑。永貴責霍罕罪。霍罕詭稱鄂斯爲已舊屬。不卽歸額德格訥。時阿卜都喇伊木爲喀什噶爾伊什幹伯克。以不獲爲阿奇木。懷逆志。數通霍罕。永貴等不之察。遣侍衛

托穆齊圖。偕阿卜都喇伊木赴霍罕。責不聽命。將以軍討。阿卜都喇伊木遣屬摩羅郭帕和卓哈勒默特告額爾德尼伯克曰。回部和卓皆就誅。惟爾存。今使來索地。不以兵從。爾勿懼而迎之。且喀什噶爾兵寡。爾潛至。我將爲應。額爾德尼伯克懼。市已。以丕色勒伯克構難。謝之。托穆齊圖抵霍罕。額爾德尼伯克不之迎。示順逆義。乃謝罪。以鄂斯邑歸阿濟拜。托穆齊圖歸。不以不迎故告。及是噶岱默特屬噶帕爾赴市。霍罕偵得情。告噶岱默特。首之。辦事大臣納世通疏聞。

詔磔誅其孥。及赴霍罕使。悉緣坐。以噶岱默特發逆謀。

獎賜幣。素勒坦沙聞額敏和卓歸。遣使和濟克蘭齋書。至稱葉爾羌大臣等前聽沙瑚沙默特偏辭。齊特喇爾。邑請仍察歸。額爾景額疏聞。

敕責素勒坦沙曰。爾詭辭具奏。豈以葉爾羌大臣新經更替。謂可欺飾耶。前駐大臣吐魯番郡王額敏和卓曰。後仍來更替。爾斯時又將何以爲辭。爾從前稱額敏和卓爲父。乃伊回游牧。卽詆其偏聽人言。亦太反覆矣。爾其循理守分。勿萌僥倖無厭之心。始可永承恩澤。

詔錄額爾景額疏。素勒坦沙書。寄示額敏和卓。令以已意達之。素勒坦沙尋遣鄂斯敏伯克至。奏嗣鈴部眾不

敢稍存異志。復覆書額敏和卓。諉罪和濟克蘭。妄造語
言。已經懲罰。

詔錄示額敏和卓。額敏和卓尋入覲。

命乾清門行走。每

晝接。輒詢諸回部情形。素賚璪率子莫弩。啟雅爾護屯
田回民赴伊犁。

三十年春。烏什回賚哈木圖拉等糾眾叛。有額敏者。薩
里弟也。居烏什城。賊脇赴霍罕。強應命。宿畢德爾山。伺
借行者寢。走阿克蘇告變。阿克蘇辦事都統卞塔海馳
兵剿。薩里助馬百。復倡議借伯克阿卜都噶頗爾等助。

牛二百運糧濟軍。

詔獎額敏不附逆復

諭曰薩里等急公效力協助性隻甚屬可嘉自當示以獎勵所助牛馬俱著賞給價值仍將朕加恩獎賞之意傳諭伊等知之副都統素誠阿奇木伯克阿卜都喇遣呢斯雅走阿克蘇告變尋素誠憂懼自殺

詔伊犁將軍明瑞往剿會額敏自烏什脫出告阿卜都拉遣屯田兵赴伊犁不給糧畜且科瘠羊四百徵回人銀被賊擒禁復納女賚哈木圖拉為免死計阿克蘇辦事副都統下塔海以聞

諭曰。阿卜都拉被回人拘禁。朕尙以阿卜都拉係玉素卜之弟。必不肯屈節。今觀伊平日縱容所屬。侵蝕回人銀兩。又納女於賚哈木圖拉。希圖臨難苟免。此與叛逆何異。豈可以其玉素卜之弟。遂從寬貸。著明瑞至烏什日。務將此等情節。查訊明確。若果所傳不妄。非獨逆回等。當族誅示懲。卽阿卜都拉亦宜明正典刑。玉素卜奏臣弟阿卜都拉擾回債事。由臣失訓之罪。

諭曰。阿卜都拉以阿奇木伯克。縱所屬滋擾激變。罪由自取。與玉素卜無涉。著加恩。勉其議處。時遣額敏和卓歸部。已就道。聞烏什變。卽奏請馳剿。

諭曰。明瑞兵若尙須協助。額敏和卓卽暫駐烏什軍前。喀什噶爾與霍罕額爾德尼部落相近。亦關緊要。烏什事竣。仍任參贊大臣。駐劄喀什噶爾辦事。賊黨巴布敦等乞援霍罕。抵布魯特。揚稱諸城悉附逆。聳辦事諸城。噶岱默特自喀什噶爾遣屬愛特伊默特赴布魯特。額德格訥薩爾巴噶什諸鄂拓克。告自烏什外。他城皆安堵。薩爾巴噶什長車里克齊遣弟海蘭達爾赴軍。噶岱默特索逆使車里克齊擒巴布敦以獻。

詔霍集斯列其戚族居烏什者以聞。錄示明瑞。俟克烏什。察霍集斯族被脇者。勿孥戮。復以烏什之叛。由伯克

阿卜都拉虐眾故。

諭曰。阿卜都拉所屬人等。任意擾害回人。素誠全未查辦。額敏和卓與玉素卜。久隸臣僕。自不致縱容所屬。擾害回人。然所屬愚人。不知事體輕重。希圖小利。倚勢橫行。著傳諭駐劄大臣等。烏什既有此等情事。可爲警戒。將來必須留心體察。約束下人。斷不可失於防範。以致自貽伊戚。有庫爾勒哈資伯克鄂璠者。以阿奇木伯克色提克責其違役。故憾之。飲其兄噶雜訥齊伯克和碩爾及族子弟等言曰。我將殺阿奇木。往取烏什。和碩爾叱之。率子三人急起走。或以告色提克。曰。阿璠和碩爾

叛矣。時喀喇沙爾辦事副都統明普率兵赴烏什。色提克檄之歸。告庫爾勒將不靖。

詔額敏和卓便道察順逆狀。復

諭明普聽其議。勿執已見。額敏和卓抵庫爾勒。訊得鄂璠情。以和碩爾不附逆。將疏請免死。明普執不可。議誅鄂璠族。疏至。

詔如所請。和碩爾等免坐。責明普謬戾。

詔色提卜阿勒氏歸理軍務。抵烏什。明瑞督兵適至。遣歸阿克蘇。以糧糗及火藥鉛丸解軍。庫車阿奇木伯克鄂斯璠聞烏什變。恐眾生心。悉收軍械。馳兵協剿。大軍

圍烏什諸路。分隊擊賊。薩里遣屬呼特呼默特入其城。招脇從者。賊不應。屢擊之。奪瑚什塔克峯險。尋克烏什城。

詔敘噶岱默特薩里績。初賚哈木圖拉。取納阿卜都拉女。將納之。逆妻有怨言。乃止。因戕阿卜都拉。復禁其女及子。烏什既定。明瑞訊得其情。

詔釋阿卜都拉孛歸哈密。

詔敘烏什勞額敏和卓并其子素賚瑞茂薩及鄂斯瑞等。並優賚之。明瑞懲烏什亂故。奏葉爾羌喀什噶爾阿克蘇諸伯克等。皆不協物議。惟鄂對材可用。請以阿克

蘇伯克色提卜阿勒氏調和闐喀什噶爾伯克噶岱默特調阿克蘇鄂對令仍任葉爾羌事

諭曰伯克等皆歸順舊人且遇有事務頗能出力報效此次若盡行移調則回人布魯特等不知情事妄起猜疑謂國家乘新取烏什之威將伊等移調若謂伊等貪圖小利亦回人常事安能保其必無惟在大臣等正已率屬賞罰嚴明地方自必安靜毋庸更調紛紜轉滋惶惑卽如所奏亦未有確實款蹟不過得之物議又安可盡信乎

三十一年玉素卜遵

旨自葉爾羌歸奏哈密生齒日繁請遣戶五百屯田伊犁以次子伊薩克護往。

允之伊薩克自伊犁歸。

詔授二等台吉玉素卜尋擢長子伊勒巴喇伊木入覲中道皆疾卒以伊薩克襲額敏和卓子伊斯堪達爾赴伊犁協理屯田務。

詔授鄂囉卜咱卜一等台吉任伊犁三品阿奇木伯克築烏什新城徙駐阿克蘇兵色提卜阿勒氏視役三十二年額敏和卓自喀什噶爾還入覲。

命御前行走。

三十三年庫車阿奇木伯克鄂斯璫來朝。

命乾清門行走烏什新城工竣。

上嘉色提卜阿勒氏勤事。

賜雙眼孔雀翎。

三十四年。

授乾清門行走鄂斯璫二等台吉。

三十五年烏什輔國公色提卜阿勒氏來朝。

命乾清門行走。

三十六年哈密札薩克多羅貝勒伊薩克吐魯番札薩

克郡王額敏和卓第六子丕爾敦入覲。

詔賜伊薩克三眼孔雀翎黃馬褂授丕爾敦二等台吉孔雀翎均

命在乾清門行走

三十八年

詔授哈密貝勒伊薩克領隊大臣赴伊犁轄屯田回民敘伊犁屯田功授伊斯堪達爾五品秩

賞孔雀翎

四十年

諭曰貝勒品級鄂對公品級噶岱默特均於未得回部以前歸誠伊犁且在軍營著有勞績自與恩封者不同

均令世襲罔替。授烏什輔國公色提卜阿勒氏喀什噶爾阿奇木伯克。

詔烏什公品級噶岱默特世襲罔替。尋卒。子阿卜都喇璦。烏什三等輕車都尉薩里卒。子海色木襲。

四十一年。

諭領隊大臣伊薩克歸哈密。吐魯番五品秩伊斯堪達爾入覲。

命乾清門行走烏什公品級阿卜都喇璦卒。子邁瑪第敏襲。

四十二年。吐魯番札薩克多羅郡王額敏和卓卒。有子

七。長子素賚瑞襲。

四十三年。葉爾羌辦事侍郎高樸。以葉爾羌阿奇木伯克鄂對卒。請令其子鄂斯瑞繼。

上不允。

詔以色提卜阿勒氏爲葉爾羌阿奇木伯克。以鄂斯瑞爲喀什噶爾阿奇木伯克。色提卜阿勒氏抵葉爾羌。察知高樸盜採官玉出售。並聽鄂對及伊什幹伯克阿布都舒庫爾等。懇懇附和狀首之。喀什噶爾辦事大臣永貴疏聞。

詔抵罪。

諭曰。今年三月。鄂對病故。高樸卽奏請以鄂對之子鄂斯瑞接辦該處阿奇木伯克事。朕以爲若如此父子相繼辦事。竟似伊家世職。久之與唐時藩鎮何異。因將色提卜阿勒氏調至該處。以鄂斯瑞赴喀什噶爾。意在回部伯克杜漸防漸。若照高樸之奏。鄂斯瑞知其父與高樸相好。有礙顏面。且年輕不更事。必順從高樸所爲。扶同徇隱。不能如色提卜阿勒氏之和盤托出矣。又

諭曰。鄂對前以軍營效力。加恩賞給貝勒品級。授爲葉爾羌阿奇木伯克。自當感激朕恩。實心報效。卽令高樸意欲騷擾回民。盜買玉石。伊當勸止。或如色提卜阿勒

氏首告始爲報朕恩施。乃竟誘高樸給予黃金五十兩。并玉石二千餘斤。令在內地販買。則伊從前早有騷擾回民盜取玉石情事。若不嚴加懲創。朕如何尙用伯克耶。倘伊尙在。卽當正法。今雖病故。自應削去貝勒品級。以示懲儆。伊子鄂斯璜現在龔爵。著傳旨卽行削去。但鄂斯璜並非隨同伊父居住。此等情事。與伊無涉。著加恩授爲散秩大臣。仍留喀什噶爾阿奇木伯克之任。旣已革去貝勒。自不便令帶雙眼孔雀翎。著賞給一眼孔雀翎。以色提卜阿勒氏能據實控告。

晉封貝子品級。其長子邁默特阿卜都拉特授二等台

吉。

賜孔雀翎。並停密爾岱山採玉。交色提卜阿勒氏管理。以絕滋擾。

授烏什公品級邁瑪第敏拜城伊什幹伯克。

四十四年。以吐魯番札薩克多羅郡王素賚璜虐所部眾。且私宮其屬。論罪。削郡王爵。

詔赴京。授一等侍衛。

詔伊斯堪達爾襲札薩克多羅郡王爵。

四十五年。素賚璜卒。

詔歸葬吐魯番。哈密郡王品級札薩克多羅貝勒伊薩

克卒。子額爾德錫爾襲。

四十八年。

詔哈密吐魯番烏什回。並世襲罔替。理藩院議。邁瑪第敏祖噶岱默特海色木父薩里。以軍功獲世職。請予世襲罔替。

詔如議。

四十九年。先是巴達克山獻布拉呢敦逆子。有薩木薩克者。幼竄安集延。

上憫其無子。

詔免捕誅。比長。窮不得食。陰遣人至喀什噶爾。勾財物。

布魯特散秩大臣阿其睦弟額爾穆等私與通鄂斯瑞聞之至是首諸喀什噶爾辦事大臣保成阿其睦懼其弟獲重罪誣阿斯瑞與同謀

詔械額爾穆等至京訊得實

諭曰阿奇木伯克鄂斯瑞感激朕恩於薩木薩克與回眾潛通音信之事毫無隱諱一經得信卽報知保成隨同實心查辦始終奮勉甚屬可嘉著加恩晉封固山貝子以示獎勵

五十二年冬庫車阿奇木伯克鄂斯瑞來朝

五十三年正月阿奇木伯克鄂斯瑞卒於京邸

諭曰阿奇木伯克貝子鄂斯瑞。歷年輸誠宣力。感戴朕恩。實心盡職。正資依任。今來京入覲。遽爾寢疾。朕遣御前侍衛帶領太醫院官往視醫治。不痊。忽聞溘逝。深爲憫惻。著遣御前侍衛豐紳濟倫往奠。仍賞銀五百兩。令辦喪事。復

諭曰鄂斯瑞所遺散秩大臣世爵。卽施恩令伊子邁哈默特鄂三承襲。但鄂斯瑞效力年久。所有固山貝子爵亦施恩令伊子邁哈默特鄂三承襲。以示朕撫恤回僕之至意。

授伊斯堪達爾喀什噶爾三品阿奇木伯克。

諭曰吐魯番郡王伊斯堪達爾前入覲時朕觀其材具尚堪造就今散秩大臣鄂斯璜病故所遺喀什噶爾三品阿奇木伯克之缺卽著伊斯堪達爾補授前往喀什噶爾隨同明亮伯興辦理事務伊斯堪達爾之兄色普拉弟丕爾敦等俱現在吐魯番著色普拉辦理游牧事務吐魯番大臣當善爲照料伊斯堪達爾著賞銀一百兩以爲遷徙家口之需卽於吐魯番官銀內撥給伊斯堪達爾雖係郡王且在乾清門行走但初赴喀什噶爾阿奇木伯克任明亮伯興諸事務須指示令照鄂斯璜任內事宜辦理

詔哈密吐魯番世襲封爵不必降等。

諭曰哈密吐魯番二部皆國家世僕其餘各城回人雖經朕平定新疆時歸降但效力幾三十年奮勉急公是以分別施恩賞給王貝勒貝子公台吉等封爵乾隆四十八年該院照例查明伊等封爵或定世襲罔替或定爲出缺後降等承襲雖係照例辦理但伊等來歸年久共感朕恩各勤職業卽如哈密郡王品級貝勒額爾德錫爾之始祖額貝都拉歸誠以來已歷數世額爾德錫爾之祖玉素卜在軍營勤勞懋著貝子鄂斯璜之父鄂對在軍營奮勉封授貝勒品級因罪削爵後鄂斯璜仍

諸事抒誠效力復封貝子色提卜阿勒氏先在軍營奮
勉又在阿奇木伯克任內數年留心辦事公伊巴喇伊
木一等台吉鄂囉木咱卜二等台吉巴巴阿布勒丕爾
敦三等台吉阿卜都呢咱爾帕爾薩伊等封爵或因軍
前效力封授或因伊祖父功績賞給若照院議於出缺
後降等承襲日久遞降殊非朕久遠撫恤回眾之至意
今施恩將議定降等承襲之額爾德錫爾色提卜阿勒
氏鄂斯瑞伊巴喇伊木鄂囉木咱卜巴巴阿布勒丕爾
敦阿卜都呢咱爾帕爾薩等十人現襲之王貝子公台
吉等封爵出缺時不必降等承襲俱著世襲罔替以示

朕優恤回僕之至意。併交該院行文各回城大臣。將朕此旨。通行曉諭。回眾人等。交相欣慶。十二月。調伊斯堪達爾。葉爾羌。阿奇木伯克。烏什貝子。品級輔國公。色提卜阿勒氏卒。

諭曰。色提卜阿勒氏。實心效力。辦理一切。感激朕恩。宣力有年。昨據塔奇奏。伊患病。朕卽賜藥。以冀速痊。茲聞溘逝。深爲憫惻。著加恩賞銀五百兩治喪。所遺貝子品級公爵。卽令伊長子邁默特阿卜都拉承襲。